

Estd. 1983

Reg. No. 386 (MZ)



MARYMA

Ramhlun North YMA Chanchinbu

“YMA thuvawn: YMA chu tanpui ngaite tanpuitu



YMA thiltum: 1. Hunawl hman that. 2. Zofate hmasawnna ngaihtuah. 3. Kristian nun dan tha ngaihsan

Vol. 44

Issue No. 32

Ramhlun North: Ni 08 August, 2026



BRANCH THU

■ August thla Khawhar In hruaitu turte:

Leader : Pu K Vungmanga

Asst Leader : Pu Lalmazawia

OB Incharge : Pu Laldinglana Sailo

1. Pu Lalpiangthara

2. Pu H. Rodinglana

3. Tv. Lalrinpuia

4. Pu Vanengmawia

5. Pu Henry VL Nghilhlova Zote

5. Nl. Laldusangi Pachuau

6. Nl. Rosangpuii

■ CYMA buatsaih Inter Branch YMA Band Contest neih mekah RNYMA band Top 20-ah kan tling a, August ni 18 zanah Vanapa Hall-ah Top 20 intihsia kana leh a ni ang.

RNYMA Band hla zir nan hian Pu Lalmalsawma (Tea), T-Sec. leh Dr. Rohlupuii Ralte w/o Dr. G. Lalthianghlama (Fam), C-Sec. ten drum set min hman tir a. Tin, kan bialtu MLA, Dr Vanlalthlana chuan RNYMA Band tanpui nan ₹ 5,000/- a hlan bawka ni. Thilpek pe tute leh bungraw hman tirtute chungah RNYMA-in lawmthu kan sawi e.



SECTION THU

■ **Saizahawla Section:** Radio a mi tur drama record zawh tawh a ni a. Inhlawhna min hmuhsaktu Pu Lalrozama Ralte, c/m leh Script ziaktu Pu Zodinglana Zote, Asst. Secy. te hnenah lawmthu an sawi. Tin, drama changtu zawng zawng te leh min record saktu Tv. Lalrintluanga, c/m te chungah lawmthu an sawi mawlh mawlh e.

■ **Vanapa Section:** Pi Melody Lawmzuali leh a faten an fapa/unaupa VL Hmangaihzuale (Fam) hriatreng nan V-Sec. te Khuang Stand tha tak pahnih an pe a, Pi Melody te chhungkaw chungah Section hruaituten lawmthu an sawi.

■ **Library duty turte:**

1. D Lianmanga, S-Sec.

2. Lawmsangpuii, S-Sec.

3. Timothy Lalbiakrema, S-Sec.

4. Josephine Lalthazuali, S-Sec.

5. Lalrokimi, S-Sec.

6. Lalremruati, K-Sec.

RAMHLUN NORTH LOCAL COUNCIL LEH ALL NGO THU

Ramhlun North, the 8th August, 2026: Ramhlun North Local Council leh All NGO Committee thukhawm chuan Ramhlun North huamchhungah zan rei tak tak thlenga dawr in hawn a remti lova, August ni 1, 2026 atang chuan zan dar 11:00 thleng bak dawr hawng lo turin, dawrkai zawng zawngte, kawngkama eitur zuar thin te leh vengchhung mipuite a hriattir a, hei hi zawm tlang theuh turin min ngen a ni. Tin, Pathianni a kawngkama in zawrh phal loh a ni a, Committee thuchhuak zawm ngei turin veng chhung mipuite min beisei a ni.

K h a w v e l
changkaw chho zel leh khawpui thatang chho zelah hian zan lam boruak hi a duhawm lo zawngin a kal chho ni berin a lang a. Zan rei tak tak thleng a hmun hrang hrang a pungkawm a, dawr hawn reng hian nghawng tha aiin tha lo tam tak a nei zawk niin a hriat.



Sualna hrang hrang pung chho mek karah khawtlang ah zalenna leh muanna a awm theih nan Local Council leh All NGO chuan he thuchhuah hi an siam a. Zan rei tak tak thleng a dawr leh eitur zawrhna hmun te hian thalaite mai bakah tleirawlte chenin punkawmna remchang a siam sak a, hmun hrang hrangah intihbuai, insual, leh thil duhawm lo tak tak a thlen chawh thin. Chu bakah, zan rei tawh hnua khawlai leh dawr bul vela bengchheng awm thin hian thenawm khawveng te mai bakah damlo leh chak lo zawkte tan harsatna a thlen thin a ni.

Hetianga harsatna hrang hrang laka inven nan leh thalai leh tleirawl te pawh sualna laka an fihlim theih nan he thuthlukna hi siam a ni a. He ngenna hi vengchhung muanna leh hmasawnna atana thil tha tak a nih avangin veng mipuite, dawrkai, leh eitur zuar zawng zawngte, inlungual taka he dan hi zawm vek turin min ngen a ni.

YMA LIBRARY KUM CHANVE HNU LAMA KAL DAN TUR

August ni 1, 2026 (Inrinni) chawhnu khan Library Sub-Committee OB Meeting, Library-ah neih a ni a, kum chanve kan hman zawh tak thlir letna leh kum chanve dang kan hman chhoh mek chungchanga hmalak zel dan tur rel a ni a. Hetiang hian hmalakna thar ruahman ni se tih a ni.

1. Kai kim lawmman thla tina sem thin chu thla hnih zelah sem ni tawh se, August & September chhunga kai kimte chu October Ni 3, 2026-ah Meet the Author hun hman paha sem tura ruahman a ni.

2. Lehkhabu return leh hawh chhuak tura intlar chhung rei lutuk a ziaawm theih nan ruahmanna thar siam a ni a, hei hi Library hawn hmasak ber atanga hman nghal tur a ni.

3. Library-a Member-te tan bik Whatsapp Group siam a ni a, hei hi Member bikte tan hriattirna pawimawh leh tul dangte inhrilh hriatna atana hman tur a ni a. Member phone la nei lote chuan an chhungte phone atanga group lo zawm tura beisei an ni.

4. Mizo lehkhabu chhuak tharte a tul anga lei chhunzawm tum a ni.

YMA Library hi veng chhung mipuiten kan hlut chho hle a, Member ni tawh, Library la tlawh lote pawh hun remchang hmasaa tlawh turin kan insawm e. Kan Library hi veng pawn atang pawha tlawh chak leh tlawh duh an awm thu kan hre fo thin a, member rawn nite pawh kan nei bawka. Chuvangin, keini a neitute hian i hlut thar deuh deuh ang u. Library enkawlina chungchanga rawtna nei chuan a enkawlute hnenah a thlen theih reng bawka e.



CHHIATNA THLEN HMA A INVEN

Mizo ten August thla hi 'Thiñin thla' tih leh 'Thlazing thla' tiin kan sawi thin a. Tun hma chuan Thiñin thla tih hi a lar hle a, tun hnuah erawh Thlazing thla tih hming hi kan hmang uar tawh zawk niin a hriat. Fur a lo thlen hian lei min, lung tla leh ruahtui tam lutuk avangin harsatna tam tak a thleng fo a, nunna hlu tak chan te pawh kan awm thin. Mihring chenna thleng phak lo, ram palailenga lei min te hi chu awm thin bawh mah se pawh a khawih dan a dang deuh a. Nimahsela, mihring chenna in leh lo a tihchhiat chang a tam a, hmun remchang lo leh lei min duhna hmun bik a in leh lo sak a nih vanga lei in a min hnan ta te, nunna hlu tak chan a lo nih tawh hnu erawh chuan eng khawh mah hian lungngaihna kha a siam tha thei tawh thin lo.

Khuarel chhiatna kan tih tam zawk hi chu mihring ten kan siam chawp hi a ang mah zawk thin. Mi thiamte rawn lo a kan leilung kan khawih chet avang te, kan siam danglam avang te hi a ni duh khawp mai. Tin, heng chhiatna a lo thlen meuh chuan tanpuina leh chhawmdawlina hna thawk turin khawtlang mipuite kan tlan khawm a, kan tlawmngaihna lan chhuahna a nih mai piah lamah Mizo nun ti nuamtu a ni bawh a ni. Hetiang a tanrualna hi thil ropui leh chhuanawm tak a ni na a, chhiatna thlen tawh hnu a hmalakna hi chuan awmzia a nei thui tawh thin lo. Thil thleng tawh a nih avangin a pawh tur ang zawng zawng a khawih pawh zo tawh thin.

Chhiatna thleng thin tam tak hi chu kan ven zawh loh a awm thin a, a then erawh hi chu lo inven lawk theih te pawh a awm ang. Chuvangchuan, chenna in leh lo kan sak dawna a hmun hma uluk taka thlan te, tuiluankawr mumal taka siam leh enkawl zui te, leh leimin hmun hlauhawma awm te vil reng chung a hmalak hi kan tih tur pawimawh tak a ni. Sawrkar, khawtlang thuneitute leh mimal tin te pawh kan tan rual a, chhiatna thlen hma a invenna hi kan ngaih pawimawh thar a tul takzet.



KHAWTHLIR

PASTOR THANGNGURA TAWNGTÂINA PÛK (PHULPUI, MANIPUR)

Manipur ram, Pherzawl District-a Phulpui khua hnaihah hian Pastor Thangngura Tawngtâina Pûk tih hmun hriat rengna pawimawh tak a awm a. He pûk hi Pastor Thangngura chuan Pathian nena hun a hmang tam berna, tawngtâina leh Bible ngaihtuahna hmun a nih avângin Kristian chanchinah hmun hlu tak a ni.

Pastor Thangngura chu kum 1891 khan Lallen (Lailen) khua, Mizoram (Lushai Hills tih lai) ah a piang a. A chhungkua chuan Manipur rama Mizoram riat lama awm Senvawn khuaah an pem ta. Kum 1910 khan Senvawn Lal Kamkhawlung Singson sawmna angin Welsh missionary Watkin R. Roberts chu Aizawl atângin kea kalin Senvawnah Chanchin Tha hril turin a lo kal a.

Chanchin Tha hrilna chu a rah hle a, Roberts Aizawl a haw hnuah zirtirtu-evangelist pathum a rawn tir leh a. Anni chuan sikul an hawng a, Chanchin Tha pawh an hrilh chhunzawm zel.

Chu hunah Thangngura kum 19 mi chauh a ni a, Krista zui hmasa ber zinga mi pakhat a lo ni ta. Mission sikulah a zir a, rei lo teah chhiar leh ziah a thiam nghal. Ringtute an pung chak hle avângin kum 1913–1914 vel khan Thado-Kuki Pioneer Mission (TKPM) din a ni a, Senvawn chu Headquarters atan hman a ni. A hotu chu Aizawl atânga lo kal R. Dala a ni. R. Dala chuan Bible zirna sikul tawi a buatsaih a, zirtirtu leh evangelist thar siam nan a hmang. Pastor Thangngura chu a zir chhuak hmasa berte zinga mi a ni a.

Kum 1917 khan Middle School exam a pass a, chumi hnuah Senvawnah zirtirtu leh evangelist atan ruat a ni. Kum 1920 khan Tinsuong khuaah a insawn leh.

Kum 1920 chhunga TKPM hming chu North-East India General Mission (NEIGM) tia thlâk a ni a, Headquarters chu Assam rama Lakhipurah sawn a ni. Hemi Mission-ah buaina a lo awm hnuah Pastor Thangngura chuan Watkin Roberts lam a tan tlat a. Chumi avâng chuan a zirtirtu hna a chên a, harsatna leh hrehawmna tam tak a tawng. Amaherawhchu, chu hrehawmna hun chuan a hla siam tam tak a lo pianna a ni.

Kum 1932 khan Thangngura chuan Phulpui khua panin a pem ta. Chu khua a?ânga furlong khat vel hlaa awm pûk pakhat chu a tawngtâina hmun bik a siam a. Ni tin Pathian nena hun hmangin a tawngtâi, Bible a zir a, a rilru a buatsaih thin. Hmun hmunah chuan vantirhkohte an lo tlawh a, thlarau khawvel ropui takte an lo entir niin a sawi thin. Chumi an hmuhtîrna chu a hla ropui "Jordan Ral" (Jordan Palai Lam) ah Chiang takin a lantir.

Phulpui khua hi a tê mah se, Pastor Thangngura hla tam tak leh thlarau lam zirtîrna hlu tak tak a lo chhuahna hmun a nih avângin Kristian kohhran chanchinah hmun pawimawh tak a lo ni ta. A hla tam tak, a

sermon leh a tawngtâina nun chuan ringtute a kaihtawh nasa hle.

Kum 1943 khan Pastor Thangngura chu Mission Field Superintendent atan thlan a ni a, Senvon Headquarters-ah awm tur a ni. Mahse chu hna thar a thawk hma ngeiin Pathianin a koh ta. A thi hma lawkah chuan kohhran hrang hrang

a tlawh kual a, mi tin hnenah kut a hnih a, "Kan inhmuh leh tawh lo vang," tiin chibai a buk thin. A zin zawh hnuah pawh lehkhah a ziah apiangah heti hian a ziaik thin:

"Huna, kal rawh, Zaiawn fate'n,
Ram ropui kan nghakhlel;
Ka lenna ram thlaler a ni."

Kum 1943, December 20 zanah chuan a natna nasa hle mah se, kohhran in chu a kal a, a vel a kal kual a, heti hian hla a sa:

"Thisen zara ka tan,
Hun engin nge maw tunah min dâl;
Thisen zara ka tan Zaiawn tlâng,
Aw engtikah nge ka han hmu ang,
Chhandamtu leh ram ni tla ngai lo."

In lam a haw leh hnuah tui a dil a, tui an pe hnu rei lo teah chuan Pathian hnenah a chawhlsan ta. A dam chhunga Lal Isua rawngbawlina a rinawm tak chu a zo fel a, a hla leh a tawngtâina nun chuan tun thlengin ringtute a kaihrui zel.

Tûnah hian Pastor Thangngura Tawngtâina Pûk chu Phulpui khuaah hriat rengna hmun pawimawh tak a ni. Ringtute leh hnam chanchin zir duh te chuan he hmun hi an tlawh thin a. He pûk hian Pathian nena inpawlina, tawngtâina, leh rinawm taka rawngbawlina nun a entir a, Pastor Thangngura chu Mizo leh Kuki Kristian chanchina hming hlu tak zinga mi a nihzia a hriat reng tir zel a ni.

Editor: Vanengmawia (7085878827); **Jt. Editors:** A. Lalfakzuala, Lalrotluangi Zote, , Henry VL Nghilhlova Zote

Manager: Lalremsanga Hnamte (8974845644); **Asst. Managers:** Zodingliana, Lalrinchhana, Lalrinawma

News Editors: Lalrintluanga, Lalrawntluanga, Andrew Lalmalsawma, Samuel R. Lalmangaiha, D. Lianmanga, Vanalremruatpuia Ralte

Circulation Managers: PB Lalhupazauva, Samuel Lahlupua, Hmingthanzuala, Vanlalrinkima, R. Zodinsanga, Zothankhuma, Lalrinchhana, K. Lalmuanpuia



ZIN & HAW

- Pu Lalthlengliana, BECM chu hna thil ah Delhi-ah a zin.
- Nl. Lalmuanpuii, BECM, chu Kohhran thilah Garodpunjee, Assam ah a zin.
- Pi Lallawmsangi w/o Laldingliana Sailo, Branch President chu Kohhran thilah Assam-ah a zin.
- Tv Michael Lalchhanhima s/o Vanlalchhawna, K-Sec. c/m Lunglei lama zin chu a lo haw leh ta.
- Er. R. Lalthakima, T-Sec. New Delhi-a in check-up a kal chu a lo haw leh ta.
- Pu Benjamin Lalbiakmuana, C-Sec. Office Duty-a Kolkata-a zin chu a lo haw leh ta.
- Pu Richard Lalsangzela te nupa, C-Sec. chu an hnathawhna hmun Khawzawl ah an kal leh ta.
- Pu Rualtinkhuma, C-Sec. chu hna thilah Mumbai-ah a zin.
- Pi Zonunsangi w/o Benjamin Lalduhawma, N-Sec. chu inentir turin Kolkata-ah a kal.
- Pu Lalthakima Colney, K-Sec. chu a hnathawhna hmun Darlawn atangin a lo haw.
- Pu Lalbiaksanga Tlau, K-Sec. te chhungkua chu chhungkaw pawimawh avangin Manipur ah an zin.
- Lalpekhui d/o Ch Lalnunkima, K-Sec. chu a zima hmun Shillong lamah a kal leh ta.



THILDANG

- Pu El Malsawmzuala s/o B. Lalmachhuana (Fam) te chhungkua chu Durtlang Leitan Ramthar atanga lo pem thlain Pi Thanghliri, T-Sec te in an luah.



LAWMAWM

- Pu Mangchungnunga, S-Sec. chu Community Health Officer-ah kaisangin, Aizawl West Main Centre-ah post a ni.



KOHHRAN

- **Presbyterian Kohhran, Ramhlun East:** Ni 09.08.2026 (Pathianni) Chawhnu Inkhawm ah Fakna Inkhawm an nei dawn a. He hunah hian zai ho bakah Praise & Worship-a hun hman a ni ang.
- **Salvation Army:** Dt.06.08.2026 (Ningani) khan Ramhlun Corps League of Mercy member 21 te chu Garodpunjee CO Bial (Garod Khawthar Society) Western Division tlawh turin an zin chhuak.

August ni 12-15 chhung hian Ramhlun Corps ah Gospel Camping buatsaih a ni dawn a, speaker atan TEM Speaker Lalrivunga rawih a ni ang. Tisa leh thlarauva tuihal apiangte lut turin kan in sawm e, camping lut tur te chu August ni 12 (Nilaini) zan dar 7:00 hmaa luh tur a ni ang. Tin, August ni 15 (Inrinni) nilengin naupang Lang Camp neih tur a ni bawh ang.

LEI PIAH LAMAH



Lalruatfeli Ralte, K-34 d/o Rochhunga Ralte, N-Sec. chu 01.08.2026 dar 12:30 PM khan GMC Hospital, Goa ah a boral a. A ruang in August ni 2, 2026 chhun dar 12:00 khan Lengpui Airport rawn thlengin hemi zan hian lumen a ni a, ni 03.08.2026 chhun dar 12:00 ah Ramhlun North Thlanmual, Zemabawh ah vuiliam a ni.



Lusun khawhar chhungte thlamuantu Pathianin vengin awmpui zel che u rawh se.



DAMLO

- Pu Malsawmthara, K-Sec. Greenwood Hospital-a awm chu in lama inenkawl chhunzawm turin a lo chhuak.
- Nl. Sarah Laldinsangi d/o Benjamin Lalduhawma, N-Sec. a nu hruaia Kolkata-a zin chu khawsik leh thawhah avangin damdawiinah enkawl mek a ni.
- Pu Joel Lalramhluna, N-Sec. chu khawsik avangin Nazareth Hospital-ah enkawl mek a ni.
- Pi Lalnunthari w/o C. Lalrochhunga K-Sec. chu Septicemia avangin LRM Hospital-ah enkawl mek a ni.
- Capt. C. Dawla, C-Sec. Synod Hospital, Durtlang a awm chu a lo chhuak leh ta.
- Pi Lalbiakzuali, V-Sec. LRM Hospital-a awm chu a lo chhuak leh ta.
- Pu Lalthnema, S-Sec. Trinity Hospital a awm chu in lama inenkawl chhunzawm turin a lo chhuak.



PAWL DANG

- **Basic Mual Mawng Welfare:** August ni 1, 2026 (Inrinni) khan Basic Mual Mawng Welfare te chuan, an huamchhung thenfai hnatlang an nei a, Thlanmual mawng ko leh in kal pawh na step te ti faiin an hnatlang.

JOHAN'S COMPUTER INSTITUTE (JCI)

(GOVT. APPROVED INSTITUTION)
Near LH Thanga Enterprise, Industry Peng, Ramhlun 'N'
Contact No. 7005608874

COMPUTER CLASS (Jul-Dec Session) (3-2)

FREE ADMISSION OPEN

COURSES: 1. DCA 1st & 2nd Sem 2. Editing (Photo/Video)
3. Application mal pawhin a zir theih e.
Timing: 6:30am-8:00am | 9:30 am-5:30pm | 7:00-9:00pm
(Weekdays a kal hman lo tan pawh Inrinni a zir turin kan ruahman sak thei e)

COMMON SERVICE CENTRE (CSC)
kaltlangin hengte hi kan ti thei bawh

PAN CARD | Learner's Licence | MUCHS Card/Golden Card | GST Registration
| Indian Passport | UDYAM Registration | Revenue (eRAM) | Motor Insurance |
Ticket Booking (Train / Flight) | Income/Residential/Tribal Certificate | Xerox |
Printing (Photo/Document) | Laminate | Binding | Online Form Fill up, etc.



KEIMAHNI

- Pu Henry VL Nghilhlova Zote, kan Joint Editor chuan ICFAI University, Aizawl ah Asst. Professor hna a hmu thar a, MARYMA Editorial Board-te chuan thinlung takin kan lawmpui a, a lawmna hun nei turin ruahmanna siam mek a ni.



CYMA THU

- Central YMA Hall-ah Central YMA leh Mizoram Volleball Association tangdun buatsaih LBS Suzuki 24th Inter Branch YMA Volleyball Tournament, 2026 Benhawn leh Fixture tlangzarh hun hman a ni.
- Central YMA Hall-ah LBS Suzuki 1st Inter Branch YMA Band Contest Elimination Round Top 20 result puanna hun hman a ni. Band Contest-ah hian Branch YMA 50 an tel.
- Director, RIPANS chu Er. H. Duhkima Treasurer leh Er. K. Lalrimawia CEC ten a Pisa-ah an hmu a, RIPANS a Nurse hna thawk tur lak chungchangah Mizo thalaite tan zau zawka kawng hawn a nih theih nana hma la tura ngenna ziaka an thlen bakah an sawipui.
- Mizoram State Project Monitoring Committee ten Eklavya Model Residential School, Sawleng building sak mek chu a hmuna kalin an enfiah a, Er. H. Duhkima Treasurer a tel.
- Pu Robert Rosanglura (63) S/o Zalawma (L), Zarkawt kum 2005-2007 chhunga Central YMA Finance Secretary lo chelh tawhtu chu 4.8.2026 dar 1:49 pm-ah a boral a, a vuina programme-ah Central YMA OB leh CEC te an tel a, Central YMA hmingin thlahna Pangpar dah a ni.
- Thingsulthliah a Central YMA rama Conference Centre sak mek leh a ramri enfelin Pu C. Lalmunliana CEC, Er. K. Lalrimawia CEC, Pu Ramherliana CEC, Pu Chawngsiamliana CEC te bakah Building leh Project Sub-Committee member atangin mi 4 a hmunah an kal.
- Nghathal khaw Lal, Tv. Ramhlunmawia Sailo-in an khaw Football Field a lo hralh leh a Lalna midang hnena a hlan vanga buaina kal zel chungchangah Manipur Group YMA, JAC Nghathal, Nghathal Branch YMA hrutute Central YMA Office-ah an lo kal a, Central YMA OB ten an lo dawngsawng.

DCA COMPUTER COURSE

ADMISSION OPEN (5-2)

December 2026 Exam

Free Benefits
✓ Free Admission
✓ Free Textbook

Limited
Seats
Available

E-STAR.COM
GOVT. APPROVED
COMPUTER
INSTITUTE
RAMHLUN NORTH

E-STAR.COM
Near Nazareth Hospital
Ph: 8731875084/7005421131

E-STAR.COM

HENGTE HI KAN SIAM
THEI BAWK

GOLDEN CARD, MUHCS CARD
SIAM, PANCARD, AADHAR CARD
DOWNLOAD, TRIBAL,
RESIDENTIAL, INCOME
CERTIFICATE, INHMUN HMING
THLAK, ONLINE A RAM TEH TUR
BOOK, UDHAM REGISTRATION,
PASSPORT PHOTO, XEROX,
PRINTING, LAMINATION,
EMPLOYMENT REGISTER,
LEARNER LICENCE, etc.,

MARYMA

PHEK 4-NA

RN YMA CHANCHINBU

ARTICLE

RAMHLUN VENG HMING
PHUAHTUTE LEH AN PHUAH DAN

- K. Lalruata, Ex. Editor, N-Sec.

Kum 1957 hmalam kha chuan hming fumfe pawh nei lovin ‘Kawng thar’ tih mai thin kha hemi kum atang hian Pu Kaiθiauva (Upa Lalthanliana pa) te chhung lo awm tan hmasa berin, tuna Ramhlun South lamah hian Pu Salhnuna, Pu LR Dama pa te chhung hi October 1958-ah an awm chhunzawm vein, tuna Ramhlun South Bus Stand chhak Pu Pataia (L) (Bata Ruata tia kan hriat tak) in hmunah hian Assam type Bawng in tiat lekah an awm a, 1959-ah chuan a bulah a aia lian hretin (15'x30') Di in bawkin an sa tha a. He laiah hian awm hmasate chuan Pathian Biak Inkhawm nan an hmang a.

Pu LR Dama chuan, “Chawlhni vawi khat chu inkhawm hote chuan inkhawm banin veng hming neih ve kan rawt ta a”. Heta kalkhawmte hi:-

1. Salhnuna, ka pa

2. Lalzapa

3. Laltlana

4. Chhuanawma

5. Hranghlira

6. Lianchhunga

7. Kei (LR Dama) te kan ni, a ti a.

(Pu C. Lalruata (RIP) chuan hetah hian Pu K. Lalkhuma (K. Lalbiakveli pa) a tel niin a ziak)

Tichuan kan han sawiho ta a. Veng hming tura duh kha kan lo nei far hlawm a. Chutia duh dan hrang a lo awm takah chuan kan duh dan theuh kan theh khawm a, thum vawra thlan mai nise, kan ti a. Kan rawtna te chu lakhawmin bawmah kan dah khawm ta a. Lengkhawm ho zingah chuan ka pa Salhnuna chu a upa ber anih bakah mitdel a lo nih bawk avangin veng hming tur pawt tur chuan an ruat ta a. Chutah leh, ama rawtna ngei mai “RAMHLUN” tih chu a pawt ta a. Pu Chhuanawma, fiamthu thiam leh rilru chak bawk chuan fiamthu in, "Ekhai, nang hi i mitdel kan ti rawk che a, a lo del tawp loh hi, ama rawtna kher a pawt chhuah theih danah, a lo enthlaru vek a nih hi" tiin a han fiam zui a, kan nui dar dar nghe nghe a. (Hei hi July 1959 niin a kalte zinga thenkhatin an sawi niin Pu C. Lalruata (RIP) chuan ‘C. Lalruata Biahzai’-ah a ziak).

A tuk thawhtanniah chuan, ka hriatreng danin Chhuanawma, Lalzapa, Laltlana te ho nen chuan chutih laia District Council hotu Chief Executive member, Pu Ch. Saprawnga hnenah kan veng hming thar chu kan va inhriattir (report) ta a. A ni Pu Rawnga chuan nui vur vur chung hian, "Nangni nimin leka awmin Ramhlun han intih ngawt mai chu! Kan ko duh dawn che u emaw ni le" tiin min fiam nghe nghe a. Chuta kan chhuak chu Laltlana leh Lalzapa chu an phur khawp mai a, "Chanmari pengah leh Bawngkawn pengah rangva phekah ziakin kan tar ang a, feiin kan kawhtir ang a, a inkar zawng chu Ramhlun a ni vek mai ang" an ti sauh sauh mai a. “Tar pawh an tar ta ngei niin ka hria” tiin Pu LR Dama (L) chuan ziakin a lo dah a ni. Tichuan, veng hming mawi ber mai Ramhlun veng kan lo ni ta a ni.

Hemi Ramhlun hming phuah tute zinga mi Pu LR Dama hi a hriatna a tha em em a, hemi tuma tel ve ho thenkhat hriat chhuah theih tawh loh kha a lo hriain ziakin a fate hnenah a lo dah diam a ni. Ramhlun Venglai Biakin thlang lawk, Complex panna kawngan ah in tha tak neiin a ni pawh hian kum 2012 khan mual min lo liamsan tawh a ni.

OUR LITTLE SHOP

(5-1)

School Uniform chi hrang hrang wholesale leh retail-in kan pe thei e. White shirt (kamis var) puan tha leh uniform socks (mawza) kan kawl bawk e.

Our Little Shop, Ruata Zote In, Ramhlun North, Biakin Mual

Ph: 9862810920/8413934118

ADVERTISEMENT

SP TUI

Tui hna thianghlum, ei leh in tlak, litre 2000 pickup trip kan pe thei e.

Mobile: 9615789047

(15-10)

L.H. SEPTIC TANK SERVICE

Septic tank paihfai leh repairing engkim kan thawk thei e.

Kum 17 chuang experience nei kan ni e.

Rate: 4500/- per trip

Ph.: 6909183193

(23-2)

KHIANGTE SEPTIC TANK SERVICE

Septic Tank khat paihfai, khur chhung lutin, Comode Block, Soak pit thar siam, Pipe Repair engkim a neitu te lungawi na thlap in kan thawk thei e.

Contact - 9862344971 Bawngkawn South

(20-3)

JM SEPTIC TANK SERVICE

Septic tank khat paih fai, comode block, pipe fit, soak pit tha lo leh a thar pawh kan siam thei reng e. Kan sulhnu a fel fai a, service hlun leh rintlak kan ni e.

Rate: inbiak remna.

Registration: MRS 542

Contact: 9862476439

(10-10)

TLUANGTEA SEPTIC TANK SERVICE

Septic tank khat paih leh repair kan ti thei reng a, rate chu inbiakremna a ni ang.

Contact: 6033373188/9612376373 C/o Marina: 9436140350

(10-10)

MAFELA SEPTIC TANK SERVICE

Septic Tank khat paih fai, commode block, pipe fit, soak pit thar siam engkim kan ti thei e.

Rate: Inbiakremna

Ph: 9233440125

(21-1)

VANCHHAWNG SEPTIC TANK

Septik tank khat englai pawh in kan paih fai thei a,repair,commod block,pippe block kan siam thei bawk e,

Rate: Inbiakremna

Ph. no: 9615458679

(10-4)

Skinnovations Unisex Hair Salon leh Spa

Dr Hruaitea chuan Unisex Hair Salon leh Spa Ramhlun North D-3 Jk Khenglawta building hnuaiah kan rawn in hawng thar a,vengchhung mipui te min lo pan ve theuh turin kan sawm a che u.

Ph: 9612800800

(2-1)

Doctor leh Nurse ten Dam lo te Anmahni in ngeiah kan pan thei ta

Novel Clinic

Serve to Heal

Clinic@Home

Enkawl theihthe

(2-1)

TIMING

7PM-10PM

Harsa taka Hospital pan kher ngai lova inenkawlna

Mahni in lumah thlamuang taka mithiamte enkawlna

Mahni mamawh dan mila inenkawlna

Hun bi nei & Book Lawk ngai anih avangin Emergency Service a tel lo

1) Suturing stitch removal

2) Dressing

3) Injection

4) Venflon fixing

5) BP Checking

6) Temperature check

7) Blood sugar check (Random)

8) Folley's/Silicon Catheter insertion

9) Folley's/Silicon Catheter removal

10) NG Tube insertion

11) NG Tube removal

12) Minor Clinical Cases

13) Mamawh & Remchang dangte

NOVEL Clinic

Ramhlun Venglai, Aizawl

(Prov. Reg. No : A-0745/26)

For Booking Dial 6009505183

KC TUI

Tui thianghlum leh fim tha em em, Pick up in litre 2000; tlawm takin kan pe thei e.

Ph: 9774 223 462 / 7005 010 327

(10-8)

Published & edited by Vanengmawia for and on behalf of Ramhlun North Branch YMA. Copies- 1,270